

**Date – 17/01/2026**

**Time - 7:30 -7:40 Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES (MORNING)**

1. State Election Commissioner Dr H. Lalthangliana'n Aizawl Municipal Corporation inthlan chu April emaw May thlaah emaw buatsaih theih an beisei a ti.
2. Mizorama lo zin, DONER Secy Pu Chanchal Kumar chuan Mizoram hmun hrang hranga hmasawna hnathawhte a enpui.
3. Parliament Budget Session lo awm turah Sawrkar chuan Seed Act 2026 a pulut dawn.
4. Prime Minister Narendra Modia chuan vawiin hian Vande Bharat Sleeper Train hmasa ber Howra leh Guwahati (Kamakhya) inkara tlan tur chu Malda khuaa rel station atangin a vailiam dawn



**SEC**

State Election Commissioner Dr H. Lalthangliana'n Aizawl Municipal Corporation (AMC) inthlan hun tur a sawi chian theihloh tih sawiin ruahman dan chuan kumin April emaw May thlaah emaw inthlan theih an beisei a ti.

Nimin khan Dr H. Lalthangliana hian a Pisa-ah Chanchinbu mite kawmin State Election Commissioner chuan, February thla a Assembly Session neih tur chu Budget Session a nih bakah sorkar tangka kum kal lai tawp hun a hnai a, sorkar hnathawk an buai vanglai a ni tih sawiin, tun dinhmuah sorkar hnathawk te chu inthlan buaipui tur a pawphen an nih chuan nghawng a neih nat dawn avangin kumin March thla hma chuan AMC inthlan a remchang lo niin a sawi bawk.

(Dr H. Lalthangliana)

State Election Commissioner Dr H. Lalthangliana chuan mipui leh political party lamin inthlan an cho tawh a, thu lawmawm lam ni mah se Aizawl khawpui chauh ni lo Mizoram pum ngaihtuah a ngaih avangin sorkar hnathawk buai vanglai taka inpawphen chuan harsatna a thlen thei a, tun hma pawhin AMC chu a hun pangngai takah an la inthlang ngai lo tih a sawi bawk.

AMC term kal mek hi kumin March ni 1-ah a tawp tawh dawn a, political party hrang hrang ten an party candidate tur te an puang tan tawh a. Inthlan atana hman tur Electoral Roll pawh January thla tir khan tih chhuah a lo ni tawh bawk a ni.



**LUNGLEI ILP**

Mizoram sawrkar Home Department thuchhuak bawhzuia Lunglei District Bawrhsapin a din Inspection Team chuan Team Leader, Sub-Deputy Commissioner Pu H. Lalhlengliana kaihhruiin Lunglei Municipal Council (LMC) huam chhunga hnam dangte Inner Line Pass (ILP) an endik.

Lunglei District Bawrhsapin ILP endik tura Inspection Team a dinah hian SDC chu Leader niin, Lunglei Sub-Divisional Police Officer chu Assistant Leader a nih bakah, Young Mizo Association (YMA) Lunglei Sub-Headquarters President chu Member a ni a. Inspection Team hi hmun hnihah inthenin, LMC huam chhung veng hrang hrangah ILP an endik a. Mi 20 vel ILP fel lo hmuh chhuah niin, dan anga ILP tinung tur leh thuneitute hmaa inlan tura hriattir an ni a. Lunglei District-a ILP endik hi a tul anga kalpui chhunzawm zel tum a ni.



**DONER SECY**

Mizorama lo zin, DONER Secy Pu Chanchal Kumar chuan nimin khan Serchhip Kawlri tlanga NEC sum cheng vbch.4 chuang senga Heritage Centre sak mek tlawhin, chawhnu lamah Thenzawla Helipad and Heliport siamna tur te, Thenzawl Peace City Greenfield Development siamna tur te leh Thenzawl Venghluna Handloom Cluster te a tlawh.

DoNER Secretary hian Thenzawl Venghluna Handloom Cluster a tlawh hnuin Thenzawl Golf Course & Resort ah hun a hmang leh a, he hunah hian Thenzawl Peace City hnuiaia hmalakna pakhat Greenfield Development siamna tura hmalaknahrilhfiyah a ni a. Golf Course a hun a hman zawh hian Thenzawl Vengthara Helipad & Heliport siamna tur chu a hmunah a enfiah zui bawk a. Greenfield Development siamna hmun tur hi a tlawh nghal bawk a ni.

Pu Chanchal Kumar hian vawiinah Sairanga Ginger Processing Unit bakah Vairengte-Sairang road 4-lane laih mek te a tlawh bawk ang.

Puan tawh angin Chief Minister Pu Lalduhoma'n Mizorama rawn zin mek DoNER Secretary Pu Chanchal Kumar chu a pisa ah kawmin Ministry of DoNER kaltlanga Mizoram hmalakna hrang hrangte a sawipui a.

Chief Minister hian Ministry of DoNER-a Mizoram sorkar project inchiyah mekte chu a rang lama chin felsak turin a ngen a. Sum sanction chhung rei thin chuan hnathawhna lamah nghawng a neih thin avangin tihtawi dan ngaihtuah a tul thu a lo hilh bawk.

Pu Chanchal Kumar hian Mizoramin tun hnaia Sawhthing Processing Unit a nei thar chu a lawmpui thu Chief Minister hi a hrilh a. Sawhthing chu Mizorama loneitu tam takte inngahna a ni a, an tharchhuak tam chho zel tih sawiin a sawngbawl dan chu DoNER Ministry in a ngaipawimawh hle tih a sawi.



## **DAMPA**

Dampa bialtu MLA Dr.R.Lalthanglianan Mamit District chhung ah zirtitu 150 chuang zet Mamit District School atanga hlawh la, khawpui lama anmahni thawk daih si an awm tih hrilh a nih thu leh hemi chungchang ngaihven tura hmalak a tum thu a sawi.

Dampa bialtu MLA hian W.Phulpui, Saithah, Parvatui, Lallen, Chhippui leh Kawnmawi khuate tlawhin khawtlang hruaitute leh political party hruaitute nen khawtlang hmasawna tur hrang hrang sawihona an nei a, harsatna hrang hrang an neihte sutkian dan tur an ngaihtuah ho a, Dampa bial chhunga school leh health sub-centre hrang hrangte a tlawh nghal a, Dampa bial chhung sikul atanga hlawh la reng si, anmahni Aizawl lama thawk daihte pawh an awm thu sawiin, thil thalo tak, siamthat thuai ngai a tih thu a sawi a. Dampa bial chhungah sorkar sikul building nei mumal lo te, an luah laite pawh chhe tak tak, siam ngai a tam hle tih a hmun ngeia a hmuh thu a sawi a. Silsuri-ah pawh zirlai naupang 160 awmnaah, zirtirtu nghetlo pahnih chauh an thawk a, sikul building luah tur an nei mumal lo a ti a. Hengte hi hmalak thuai anih theih nan bialtu MLA a nih angin sorkarah a thlen ang, a ti bawk.

Dr.Lalthangliana chuan, an sorkar laia health Sub-Centre 289 Health & Wellness-ah an hlangkai leh Sub-Centre awm lohnaah Health Clinic 235 an din te chu tun sorkar tharin a tihtawp ta vek tih sawiin, tunah hian health sub-centre leh PHC ah pawh health worker awm lohnaah a awm a, thawktu hrang hrangte indaihlohna a nasa hle a ti a. Health service chu mipui thih leh dam inkara thawktute an nih avangin, sorkar pawhin thil dang zawng aia a ngaih pawimawh a tul a ni, a ti bawk.



## **JOB FAIR**

National Institute of Electronics and Information Technology (NIELIT) buatsaihin nimin khan Aizawl Millennium Centre chung zawlah NIELIT Job Fair 2026 neih a ni.

Labour, Employment & Entrepreneurship Department (LESDE) Secretary Dr Lalhriatzuali Ralte chuan he hun hi hmanpuiin, Mizo thalai ten IT lamah theihna sang tak an nei a, mahni inkiltawih mai loin thiamna sang zawk hai chhuak turin thalai ten theihtawp an chhuah a pawimawh tih a sawi.

(Dr Lalhriatzuali Ralte)

NIELIT Job Fair 2026-ah hian tualchhunga Private Firm hrang hrang hrang an thu a, anni hian an hnena hna thawk tur zawngin Lehkathiam hna la hmu lo ten interview hmachhawnin a theih angin hna pek an ni.



## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh [newsonair.gov.in](http://newsonair.gov.in) ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



## MPCC

Mizoram Pradesh Congress Committee MPCC Vice President Pu C Ngunlianchungan District Council ah ZPM in BJP tel lovin sawrkar an siam ngamlo a ti.

Nimina Aizawl-a Congress Bhavan Political Sessionah thusawiin Pu Ngunlianchunga chuan LADC ah MNF leh ZPM in sawrkar siam tum in thuthlung an ziak a, chawlhkar thum a ral hnuah pawh Governor office atangin engmah hmalakna a awm loh avangin MNF lam chuan ZPM hotu lu lamin sawkar siampui turin an duh lo ni a ngaiin Congress chu sawrkar siampui turin an sawm ta zawk a ni a ti a.

ZPM sawrkar chuan BJP an hlau hle a ti a, Governor pawhin a ngai pawimawh vak lo niin a lang a ti. ZPM chuan Governor Office atangin file pawh an nawr chhuak hlei thei lo a, Council of Minister ten CADC chungchanga an thurel pawh engahmah ngai lovin CADC sorkar a suspend chhonzawm zel tih sawiin ADC sawrkar a tluk chuan Governor in administrator an ruat thin a, tunah hian adminiatrator tumah ruat an ni lo a, regular a thawk ten hlawh mumal pawh an la hlei thei lo a ni a ti.

District Council inthlan hi Mizoram sawrkar hmel lanna tih a nih thin laiin LADC inthlanah ZPM chuan seat 6 chiah an la thei a, rorel lai party in chutiang zat lek seat an la ngai lo a ti bawk.

Pu Ngunlianchunga chuan Chief Minister chu thudiklo sawi thinah puhin sawrkar hmasa te sum bat cheng vaibelchhe 6311 an rul tawh a, anni chuan leiba hnutchhiah an tum ve lo ti a Chief Minister sawi chu chhangletin cheng Vaibelchhe 6311 chu tu hnenah nge an pek tih a zawt a, Administrative Approval a awm em tih leh Expenditure Sanction a awm em tih zawtin, tun sawrkar hian engang pawhin kal dik tum se a leiba pek bang a nei ngei dawn a ni a ti.



## BJP G RAM G

BJP Lunglei Dist President Pi R. Lalbiaktluangi chuan ni 100 inhlawhna MGNREGS thlakna Viksit Bharat G RAM G chungchang Lunglei-a thuthar thehdarhtute hmaah nimin khan a sawifiah a

Pi R.Lalbiaktluangi chuan MGNREGA kha kum 20 Chuang India ramah kalpui a ni a, mipuiin an hmang tangkai a, PM Pu Modi a kaihhruai BJP Sorkar pawhin kum engemawtichen a kalpui a, mahse a aia tha zawk leh felfai zawk a kalpui tur te, belh ngaite belhin G Ram G chu a lo duang chhuak ta a ni a ti.

G Ram G chu Vikshit Bharat kalpui mekah hmasawna tluantling a awm theih nan kalpui a ni tih sawiin he scheme hi hmeichhia leh tar chaklo tan pawh a tangkai dawn a, VC te pawh hman tangkai an ni ang a, kum 1 ah ni 125 inhlawhna a awm

dawn a, ni 60 chu buhseng lai vel a chawlh nan hman tur a ni a ti a, hnathawh hkan loh pawhin hlawh hi an lo la lawk thei ang a ti. NREGS hunlai a diklo tak a sum hmanna phuahchawp ang mai mai kha a bo tawh dawn a, Internet hmangin finfiah theih vek a ni tawh ang a ti.

He hunah hian Pu K.Vanlalvena,Vice President BJP pawhin G RAM G hi Khawvela India mipui diktaka phochhuahna tur leh rethei zawk te intuamhlawmna tur a ni tih sawiin minimum wages zat tur hi la sawi theih ni lo mahse Economy a zir zel a sang a hniam tur a nih a rinawm a ti.

Nimin vek khan BJP Mizoram State OfficeAizawl ah VB-G-RAM-G Scheme thar zir hona hun neih a ni.



**SEED ACT**

Parliament Budget Session lo awm turah Sawrkar chuan Seed Act 2026 a pulut dawn. New Delhi-a chanchinbumite kawmin Union Minister of Agriculture and Farmers Welfare Shivraj Singh Chouhan chuan he dan hian ramchhunga thlai chi chhia, a suak leh dankalha hralh thin a ti tawp dawn a ti a. Hei bakah hian loneituten thlai chi tha ber chi an dawn theih nan dan hian hma a la ang a ti bawk.



**VANDE BHARAT**

Prime Minister Narendra Modia chuan vawiin hian Vande Bharat Sleeper Train hmasa ber Howra leh Guwahati (Kamakhya) inkara tlan tur chu Malda khuaa rel station atangin a vailiam dawn.Hei bakah hian Guwahati-Howrah Vande Bharat Sleeper a vailiam bawk ang.

Air Conditioner hmang Vande Bharat Sleeper train hian khualzin thlawhna ang chiaha nuamsa leh man tlawm siin zin mite tan remchanna thar a siamsak dawn a. Hmun hla zawk te reilote in him zawkin a thlen theih dawn a. Vande Bharat Sleeper train ah hian pindan 16 a awm dawn a. passenger 823 an awm dawn a ni.

